


常熟縣儒學志



常熟縣儒學志序

海虞博士弟子負集楊明府脩
學事為志八卷離其凡為十八
曰殿宇曰崇聖曰神位曰祭儀
曰祭器曰樂器曰樂舞曰飲射
曰官師曰廩祿曰學田曰書籍

曰名宦曰鄉賢曰進士曰鄉舉
曰歲貢曰碑文其義則小序悉
之矣予既卒業而深歎夫學校
之化不可數幾于世也學政至
周始詳而亦與周俱衰漢文帝
始有詩博士景帝因之武帝五

經置博士及弟子員皆太學在
京師而郡國立學校官自蜀文
翁始平帝時立學官郡國曰學
邑侯國曰校校學置經師一人
鄉曰庠聚曰序序庠置孝經師
一人郡國又有文學掾固已達

之天下矣然史傳所載何武李
忠寇恂衛颯任延秦彭鮑德魯
丕之屬皆刺史郡守相以興學
著名而邑令長可考見者僅宗
均調辰陽長為立學校兩漢四
百年邑令長稱循吏不少上之

人功令具在而教學濶踈若此
豈以地褊小割雞焉用牛刀耶
先刑法而後教化政日趨簡俗
日趨偷也漢最近古何望于叔
季之代國家承平久玩愒滋邑
令日迫饜事救過不給奚暇言

學如海虞即兩漢且希邁士千
載而一邁公上為一下為二宜
何操焉亦請以漢事喻經術以
經世務窮經致用以意逆志是
為得之其有書煩而無要詞雜
而無指歸專門聚訟枝葉蕃蔓

一經說至百萬餘言解頤折角
諸名號起而競心生斥驪駒狗
曲以肆詈占橋下據屐以免難
造讖緯妖妄血書端門以希世
非學也學培養士節貧賤不移
富貴不淫以教子一經較黃金

滿籛以明經取青紫如拾芥大
會諸生陳車馬印綬曰今日所
蒙稽古之力而成自愧農家子
豈意為學之利甚者俛眉承睫
傲進明時鴻都一學之士封侯
賜爵而士君子恥與為列非學

也如賈三倍君子是識以于婦
寺士羣萃而處父子長幼所言
孝弟仁義不見異物而遷槐市
百行為隧諸生朔望會且市各
持其郡所出貨物及經傳書記
樂器相與買賣雖容揖讓論義

槐下是士為市也論義揖讓奚
貴焉非學也不在其位不謀其
政居是邦不非其大夫危言深
論不隱豪強自公卿以下畏其
貶議屣履到門三公辟召常出
其口卒釀黨錮之禍非學也夫

學之興始未嘗不名實相副末
乃相鑿也豈公所以為海虞士
望乎公能舉漢吏所不備之典
士能修漢儒所未盡之美兩相
得而益章海虞名公卿後先接
踵如志所載更僕未易數士異

日起家領大邑為士師帥寧異
人任哉前事之不忘後事之師
也禮曰官先事士先志士志定
而大人之事備是志也將見諸
行事匪託空言予不敢遠引三
代以上第刺取兩漢卑之無高

論姑以為志執左契云
賜進士出身通奉大夫陝西布
政使司右布政使兼按察司僉
事

予告前兩任浙江山西按察使
七任江西河南四川山西陝西

左右叅政四奉

勅提督陝西學政整飭江北河
西洮岷兵備翰林院脩撰

國史官京山李維楨謨

門下晚學嚴耨書

脩海虞學志叙

海虞故文學里也余不佞則楚鄙
樸蕪中人謁選得承乏茲土時詫
余弁纓而觀俎豆之塲無益其不
相肖既受事入其澤官周視殿廡
堂閣詢其創置顛末若多所圯缺
云大者如

常熟縣儒學志

叙一

天子肆俊士於膠庠即以先師禮
祀孔子令歲時什菜什奠以不忘
所自乃亦多具文以承者余儼然
有愛羊之思而未有以當也會雲
杜本石李先生以振鐸至本石博
雅君子也既精於典故尤率履不
越以視先諸士乃相與共兩朱先

生討訓故實而輕重舉之諸凡什
奠之禮如數升奏之節如制尊經
閣如名月課士如事覈正養士之
田如籍庶工粗有次第夫亦既觀
俎豆之場無辭於不知禮聊同三
先生與諸俊士脩行故事已耳諸
弟子負繆生肇祖嚴生柵等若以

是可備虞學文獻之未足相與私
誌之更蒐賢踪宦蹟及藝文之散
失與復在斷碑荒碣者綱挈而紀
分之比事拾遺得若干卷誌成群
請刻其策以觀來者揚子曰志史
之流也聖人之於文所重惟史其
說禮也輒嗟文獻之弗足而志祀

宋之莫徵事非文弗垂也虞聲名
文物之盛甚矣夫志惡可已也要
以徵往昭來余徵有感於虞之初
焉虞當商周間不猶然荒服榛莽
之區乎仲雍入而虞之名尊子游
出而寓內尊虞者傲然與鄒魯埒
夫仲雍徒去侯封文身斷髮祈與

俗俱渾耳如今時之所駭逐之以
為榮驚之以為高者仲雍無有也
子游北學於中國是時冠劍簪纓
之倫與飾名競來者何可勝原而
率不能與沾、愛人易使之武城
宰爭晦流則虞之開今日聲名文
物之盛與今日養聲名文物之盛

於益光者所重可知也

明天子右文以科目進士而陶成之於澤宮士之於進取如車之輓舟之楫脫是無以托於行豈其必文斷隱放要以大人經世有如不得已而應之則養之力沉發之力全世與已共不失焉如第以學者

舍人爵榮名若別無安身立命之處童而習之日夜蟬螿以競視飲食裘葛焉失之弗快也將無仲雍之耻與人且以窺其出之所竟而躁之所受也夫誠漱六經之精得聖人之一不絃歌武城不掩子游之文宰武城行學道之端宰天下

究學道之量則子游之為子游具
在若泛於南方精華焉求之失其
質矣余以為今日之謂膠庠者獵
較功名之場也還其源於學而靜
以觀之今日之謂文學者矜悅粉
藻之飾也歛其浮於道而質以出
之處不失文學之真出使人實牧

文學之用是為重虞學而不失虞
之初若夫制度文章之舉前事之
不忘焉耳漢成都不有禮殿講堂
乎帝王聖賢寫在目間一時侈為
盛舉卒之人文之蔚起者賦上林
子虛頌金馬碧雞微取一人之寵
高足里門耳再起而為草玄羨新

風斯愈下豈其益於國家古文之
數夫登高則望臨深則窺處地便
也何況文鄉墨儒履先賢君子之
地而可無善返其初語尤有之無
高不可升不必畫岡陵以為望也
無深不可探不必畫崖壑以為窺
也仲雍姑無論今子游而在文學

或非其所駐足之地夫沉涵德行
之源鬱養英華之積使虞學之詎
儒名公賁相望於當日者尤光大
於來許庶幾哉益以備文獻之全
今日願與諸俊士志之矣諸士其
有意乎本石听然而笑曰真吾楚
鄙樸藪中語迂而遠於事情然可

以備志之一說因弁諸簡端
賜進士出身文林郎知常熟縣事
應山楊漣撰

邑諸生浦世彥書

常熟縣學政志序

揚侯之治常熟也俗化風淳百廢具舉
尤加意於學校常熟風稱名邑蓋言公
之梓里也遺墟故井猶然在焉而學舍
崩摧講堂盡圮素王之鐘簋空懸羣賢
之遺豆不設侯下車謁廟之日見之心
惻首捐月俸繼爨贖鍰經營相度棟宇
一新雖時詘不能舉盈而卒不費官一

得民半孫凡祭祀禮樂之盛品物器數
之繁莫不援古準今燦然大備而又置
學田以贍士餼社師以養蒙每當朔望
必躬親較閱程其勤惰而賞罰之於是
里弦歌而巷誦讀其君子愛人小人易
使言公之遺化庶幾可復振乎然以學
政行於一時學志垂之沒世甚矣志之
不可無作也爰集文學掌故博士弟子

攷求採葺品列臚分以成此書新宮翼
翼輪奐有赫誨此多士式此百辟志廟
宇第一聖道煌煌日月經天崇正闡邪
億萬斯年志崇聖第二素王設教南面
正位無壽而尊不祿而貴志神位第三
犧牲玉帛粢盛蘋藻伏臘烝嘗萬世師
表志祭儀第四俎豆樽壺敦說鼎彝必
備必親神如在斯志祭器第五鍾鼓管

箏陶磬祝圉梁瑟壎篪靡一弗舉志樂
器第六羽旄干鉞執籥秉翟式歌且舞
洋洋來格志樂舞第七飲以明禮射以
觀德無憚無傲其儀不忒志飲射第八
涉儒濟之公職設官誦道授業芹室杏
壇志官師第九素榆非暖松桂非寒于
以代畊首嘗闡于志廩祔第十膏腴畎
晦養士食貧婚嫁喪葬衣襦米薪志學